

**INAMA
NKENGUZAMATEKA**

Gitega, le 28/8/2023

Adresse : Avenue du Peuple Murundi
B.P. : 114 Gitega
Tél. : (+257) 22 40 50 08
 22 40 5023
Site Web : www.senat.bi
E-mail : info@senat.bi
 senat@senat.bi

N. Réf : SNB/ COM V/...../2023

Commission permanente chargée des questions administratives, de décentralisation et du contrôle de la représentativité dans les institutions



A Son Excellence Très Honorable Président du Sénat

à

Gitega

Objet : Transmission d'un rapport

Excellence Très Honorable Président,

J'ai l'honneur de vous transmettre en annexe à la présente, le rapport d'analyse par la Commission permanente chargée des Questions Administratives, de Décentralisation et du Contrôle de la Représentativité dans les Institutions **du projet n°1/... du .../.../2023 de loi portant ratification par la République du Burundi de l'Accord entre le Gouvernement de l'Etat du Qatar et le Gouvernement de la République du Burundi concernant la règlementation de l'emploi des travailleurs burundais dans l'Etat du Qatar, signé à Doha, le 07 mars 2023.**

Vous en souhaitant bonne réception, je vous prie d'agréer, Excellence Très Honorable Président, l'assurance de ma très haute considération.

POUR LA COMMISSION PERMANENTE CHARGEÉE DES QUESTIONS ADMINISTRATIVES, DE DECENTRALISATION ET DU CONTRÔLE DE LA REPRÉSENTATIVITÉ DANS LES INSTITUTIONS ;

SENAT

**INAMA
NKENGUZAMATEKA**

Adresse : Avenue du Peuple Murundi
B.P. : 114 Gitega
Tél : (+257) 22 40 50 08
22 40 50 23
Site Web : www.senat.bi
e-mail : info@senat.bi

N. Réf : SNB / COM.V. /.../2023

Umurwi wamaho ujejwe ibibazo vy'intwaro, kwegereza ubutegetsi abenegihugu no kugenzura ingene baserukiwe mu nzego z'igihugu



LEG VI /RAP 101

**Igenekerezo rya 28
Myandagaro 2023**

ICEGERANYO GISHIKIRIJWE N'UMURWI WAMAHO UJEJWE IBIBAZO VY'INTWARO, KWEGEREZA UBUTEGETSI ABENEGIHUGU NO KUGENZURA INGENE BASERUKIWE MU NZEGO Z'IGIHUGU KU NTEGURO Y'IBWIRIZWA INOMERO 1/.... /RYO KU WA.... 2023 RYEREKEYE AMASEZERANO HAGATI YA RETA YA QATAR NA RETA YA REPUBURIKA Y'UBURUNDI KU BIJANYE N'INDINGANIZO Y'IBIJANYE N'AKAZI KU BAKOZI B'ABARUNDI MU GIHUGU CA QATAR RYATEWEKO UMUKONO I DOHA KU GENEKEREZO RYA 7 NTWARANTE 2023

I. INTANGAMARARA

Igenekerezo rya 28 myandagaro 2023, abakenguzamateka bahuiriye mu murwi wamaho ujejwe ibibazo vy'intwaro, kwegereza ubutegetsi abenegihugu no kugenzura ingene baserukiwe mu nzego z'igihugu barakoranye kugira ngo bigire hamwe integuro y'ibwirizwa ryerekeye amasezerano hagati ya Reta ya Qatar na Reta ya Repuburika y'Uburundi ku ndinganizo y'ibijanye n'akazi ku bakozi b'abarundi mu gihugu ca Qatar.

Muri ivyo bikorwa Reta y'Uburundi yari yaserukiwe n'Umushikiranganji w'imigenderanire y'Uburundi n'ayandi makungu hamwe no gufashanya mw'iterambere kugira ngo asigure imvo n'imvano yatumye Reta irungika iyo nteguro kugira ngo Inama Nkenguzamateka iyige yongere iyemeze. Abakenguzamateka bari bitavye ivyo bikorwa barashikirije amakenga bari bafise kuri iyo nteguro y'ibwirizwa hanyuma Umushikirangaji arabaha umuco yongera arishura n'ibibazo bamushikirije.

Mu kwihezeza integuro y'iryo bwirizwa, hakoreshejwe:

- ❖ Ibwirizwa Nshingiro rya Repuburika y'Uburundi;
- ❖ integuro y'iryo bwirizwa yarungitswe na Reta hamwe n'imvo n'imvano yaryo;
- ❖ urwandiko rw'amasezerano rwateweke umukono ;
- ❖ urwandiko Umukuru w'ighugu n'umushikiranganji w'ubutungane bazoterako umukono rwerekana ko bemeje ayo masezerano;
- ❖ integuro y'ibwirizwa nkuko yizwe ikongera igashikirizwa n'Inama Nshingamateka.

Iki cegeranyo kigizwe n'ibice bikurikira:

1. intangamarara;
2. inyungu y'ayo masezerano;
3. ibiri muri ayo masezerano;
4. ibibazo vyashikirije intumwa ya Reta n'inyishu zatanzwe;
5. gusozena.

II. INYUNGU IRI MURI AYO MASEZERANO

Iyi nteteguro y'amasezerano iratunganya neza ibijanye n'abarundi bipfuza kuja kurondera ubuzima mu gihugu ca Qatar mu ntumbero yo kugira bazogende bizwi kandi bashobore gukwirikiranwa neza. Ije gutorera umuti abahora baca mu nzira zitazwi hama iyo bishitse bakagira ibibazo canke bagafatwa nabi bakabura uwo bitura haba mu gihugu cabakiriye canke Uburundi bagiye bavamwo.

Izofasha kandi kugabanya ubushomeri mu rwaruka no kurinda igurishwa ry'abantu biciye mu kinwabi. Ikindi ni uko na Reta y'Uburundi izoharonkera amahera mvamakungu.

III. IBIRI MURI AYO MASEZERANO

Turetse intangamarara, integuro y'iri bwirizwa igizwe n'ingingo 18.

- ❖ Ingingo ya mbere yerekana ko Ubushikiranganji bw'akazi bwa Reta ya Qatar hamwe n'Ubushikiranganji bw'imigenderanire y'Uburundi n'ayandi makungu hamwe no gufashanya mw'iterambere bwa Repuburika y'Uburundi bushinga amateka n'amategeko nkenerwa mw'ishirwa mu ngiro ry'aya masezerano;

❖ ingingo ya 2 yerekana neza ko itangwa ry'ubuzi, kwinjira no kuronka akazi mu

gihugu ca Qatar ku benegihugu b'Uburundi bizokorwa hisunzwe amabwirizwa y'ivyo
bihugu vyompi uko ari bibiri ;

❖ ingingo ya 3 iratomora inzego zizokurikirana itunganwa ry'itangwa ry'ubuzi hamwe
n'ruuhara rw'umwe umwe wese;

❖ ingingo ya 4 itegekanya ko igihugu ca Qatar cobanza kwerena ibisabwa abakozi
bipfuza kuzokorerayo. Aha twovuga ubumenyi, uburambe mu kazi hamwe n'ivyo
banonosoye, ikiringo ako kazi kazomara, ingene uwukaronse azofatwa nko ku bijanye
n'umushahara, uturusho azoronka karangiye, ingene ikiringo c'ibanze kingana hamwe
n'ibijanye no kwiyunguruza n'uburaro eka mbere n'ico cose cotuma abakozi bafata
ingingo yo gutera igikumu ku masezerano y'akazi;

❖ ingingo za 5, 6, 7 ziratomora neza uruhara rw'umwe umwe wese mu begwa n'aya
masezerano mu ntnumbero yo kuyashira mu ngiro cane cane abashikiranji
bayateyeko umukono;

❖ ingingo ya 8 yerekana ko umukoresha ari we ategerezwa gufata mu minwe ibijanye
n'urugendo agiye gutangura akazi, aje mu karuhuko canke atahutse ikiringo
categekanijwe kirangiye. Irategenkanya kandi ko umukozi atanze imihoho canke akoze
ikosa rituma yirukanwa mu kazi atazorihirwa itike rimutahukana hamwe n'uturusho
duhabwa uwurangije ikiringo ciwe mu bugwaneza ;

❖ ingingo za 9, 10, 11 na 12 zijanye n'umwumvikako n'ivyo umwe wese yiyemeje
hagati y'abakoresha n'abakozi, ururimi rwemewe mw'iyandikwa ry'amasezerano
y'akazi hamwe n'inzego zifise ububasha bwo kwemeza ayo masezerano;

❖ ingingo ya 13 yerekana ko ubushikiranji bw'akazi bwa Reta ya Qatar ari bwo
burekuriwe gukwirikirana ishirwa mu ngiro ry'aya masezerano mu duce twayo twose.
Irerekana kandi ko ari nabwo burekuriwe kwakira ibirego mu gihe hokwaduka
amatati aturutse ku masezerano y'akazi hagati y'umukozi n'umukoresha;

❖ ingingo ya 14 isigura ko ikiringo akazi kazorangirirako kiba kizwi. Iratomora kandi ko
umukoresha yashimye umukozi akipfuza kumwongera ikiringo abimumenyesha
hasigaye n'imiburiburi iminsi mirongo itatu (30) imbere yuko kirangira;

❖ ingingo ya 15 iremerera umukozi kurungika mu gihugu c'amavukiro utwo yiziganirije
ku mushahara wiwe hisunzwe amategeko agenga ubutunzi bw'igihugu ca Qatar;

❖ ingingo ya 16 itegekanya ishingwa ry'umurwi ugizwe n'abantu batarenga batatu ku
gihugu n'ivyo uzorangura mu ntnumbero yo gushira mu ngiro aya masezerano. Uwo
murwi uzokorana rimwe mu mwaka canke ~~mu~~ gihe cose bikenewe ;

- ❖ ingingo ya 17 yerekana ko aya masezeno ashobora guhindurwa mu gihe ivyo bihugu vyompi uko ari bibiri bivyumvikanye hisunzwe ingene yashizweho;
- ❖ ingingo ya 18 ari na yo yanyuma iratomora ko ayo masezerano aja mu ngiro igihe hazoba habaye ihanahana y'inyandiko zerekana ko abakuru b'ighugu bose uko ari babiri bavyemeje. Irerekana kandi ikiringo azomara n'ingene ashobora gufutwa burundi.

IV. IBIBAZO BIZOBAZWA INTUMWA YA RETA

IKIBAZO CA 1

Mu mvo n'imvano agace ka 6, muratubwira ko iyi nteguro y'ibwirizwa ije kugwanya ubushomeri mu rwaruka rw'abarundi hamwe n'urudandazwa rw'abantu haba mu Burundi canke mu mahanga.

Nyakwubahwa Mushikiranganji,

- a) **ko tuzi ko muri kahise k'ighugu cacu habaye ibihugu bimwe bimwe vyo muri ako karere ka Aziya vyigeze kwipfuza gutwara abarundi nk'imbohe (traite des esclaves), ubwo ntituzohava dusanga turiko dusasira indava ubundi buryo bwo gutwara abarundi mu gutera igikumu ku masezerano bene ayo?**
- b) **mbega ko tuguma twumva ko n'abagenda hari ababandanya bidoga ku mbuga ngurukanabumenyi ko bafashwe nabi aho bashikiye, none mwotwizeza ko aya masezera turiko turasinyiranira n'ighugu ca Qartar hari ico azohindura kuri iyo myidogo ?**

INYISHU

- a) Ni vyo nk'uko mwabivuze, mu gihe ca kahise hari ibihugu bimwe bimwe vyo mukarere ka Aziya, nka Arabia Saoudite, Oman, Koweit vyatwara abarundi n'abarundikazi bikabafata nk'imbohe zagiye kubakorera. Igitandukanya ico gihe n'ubu, n'uko aho hambere babatwara babacishije mu kinwabi ata masezerano ivyo bihugu vyaba bifitaniye n'Ighugu c'Uburundi mu vyo guhanahana abakozi, bisigura ko iyo babaronse gutyo babafata uko bishakiye kuko atamategeko abakingira aba ahari. Ubu rero ntibizomera gutyo kuko ubu bwa none abarundi n'abarundikazi bazogenda bafise

amasezerano abakingira. Bisigura ko igihugu c'Uburundi gifise ico cishimikiza mu kubakingira, no mu kubatabara : ni amasezerano cateyeko igikumu hamwe n'igihugu bagiye gukoreramwo. Bitandukanye na kare aho umurundi yameregwa nabi ataco igihugu c'uburundi cishimikiza ngo kimukingire canke ngo kimutabare. Noneho n'umugwi w'abahinga ugizwe nimpande zibiri uzoshirwaho hisunzwe ingingo ya cumi na gatandatu yaya masezerano kugirango ukurikirane neza ingene ayo masezerano ariko arashigwa mu ngiro. Bibonetse ko hari uruhande rumwe ruriko rurahonyanga ayo masezerano, urundi ruhande ruzogira ico rubivuzeko nk'uko bitegekanijwe muraya masezerano nyene mbere bibaye ngombwa ayo masezerano tuyahagarike nkuko bitegekanijwe mu ngingo ya cumi n'umunani y'ayo masezerano.

b) Twese turazi ko atavyama vyera ngo de, naho amasezerano ahaba ntihabura utunenge, ariko twomenya ko aya masezerano duterako igikumu yubakiye k'umwumvikano hagati y'ibihugu kuburyo ico ivyo bihugu vyumvikanye biggerageza kubikurikiza.

Ariko, twashaka tumenyeshe ko igihe cose hariko harashirwa mu ngiro imigambi iyo ari yo yose ntihabura urunturuntu. Dushatse kuvuga ko, birya mwumva ku mbuga ngurukanabumenyi vyose atari vyo. Turafise ubuserukizi muri ivyo bihugu, nka Arabiya Saoudite, Oman, Qatar, Emirats Arabes Unis, iyo twumvise mwene ivyo bintu, burashika kuraba. Akensi rero basanze atari vyo. Aha rero twobizeza ko aya masezerano twayateyeko igikumu n'igihugu ca Qatar ata ngorane azotera ahubwo azogabanya mbere cane ingorane zahora zishikira abarundi muri iyo minsi iheze na rirya dufiseyo ubuserukizi mu vyo bujejwe harimwo gukingira inyungu z'abakozi b'abarundi binyambukira.

IKIBAZO CA 2

Mu mvo n'imvano, haravugwako integuro y'iri bwirizwa ije gushimangira imigenderanire yari isanzwe hagati y'ibi bihugu uko ari bibiri.

Nyakwubahwa Mushikiranganji,

- a) mwotubwira ingene iyo migenderanire yari isanzwe yifashe imbere yo gusinyiranira aya masezerano ?**
- b) mwoducira kumayange ibisata bikuru bikuru mwahora mushimikirako mu gukorana ?**

INYISHU

- a) Imbere yo gusinyiranira aya masezerano, imigenderanire y'uburundi na Qatar yari yifashe neza cane ari naco canatumye ibibihugu uko ari bibiri vyipfuza gusinyiranira amasezerano yo guhanahana abakozi. Musanzwe mubizi ko abarundi n'abarundikazi ari abana b'igihugu, ntawobitsa rero abana biwe uwo badafitaniye imigenderanire myiza. Iyo migenderanire rero ishimangirwa n'ingendo zitandukanye zigirwa n'abategetsi ku rwego rwo hejuru ku mpande zose hiyongeyeko ko Uburundi bwamaze kwugurura ubuserukizi muri ico gihugu ca Qatar guhera kw'igenekerezo rya 20 nyakanga 2021.
- b) Mu bisanzwe imigenderanire y'Uburundi na Qatar si iya kera cane, ugufashanya hagati y'ivyo bihugu bibiri kwari gushingiye ku gushigikirana biciye mu mashirahamwe mpuzamakungu aho nk'akarorero mu nama mpuzamakungu y'ibihugu bikiri mu nzira y'amajambere yabereye i Doha kw'igenekerezo rya 05 gushika 09 ntwarante 2023, ico gihugu cemeye gutanga amafaranga y'amanyamerika angana imiriyoni mirongo itandatu yo gushigikira umugambi wo gufasha ibihugu bikiri mu nzira y'amajambere n'Uburundi burimwo. Muri ico kiringo nyene Umukuru w'igihugu c'Uburundi n'Umwami wa Qatar barabonanye baragiranira ibiganiro bijanye n'imigenderanire hagati y'Uburundi na Qatar.

Umukuru w'igihugu cacu yarabonanye kandi n'uwtwara ikigega ca Reta ya Qatar kiraba iterambere bavugana uko ico kigega cofasha Uburundi mu bisata bitandukanye nk'idero, amagara y'abantu, uburimi n'ubworozi hamwe n'inyubako. Haciye hajaho umurwi uhurikiwemwo na bose wo kwiga no gutegura imigambi yosirwa imbere. Iyo migambi na yo ikaba yaramaze gushikirizwa ico kigega kugira kiyishigikire. Tukaba twobamenyesha ko hari n'ayandi masezerano ariko araganirwako n'impande zose kugira ategweko igikumu, akaba ashimikiye ku butunzi, ku rudandazwa, ku buhinga, n'ibindi.

IKIBAZO CA 3

Mu ngingo ya 3 harategekanijwe ingene ivyo bihugu vyompi uko ari bibiri bizohanahana abakozi. Ku vyerekeye Uburundi, batubwira ko Ubushikiranganji mu vyo bujejwe harimwo gufashanya mw'iterambere buzogerageza gutanga abakozi basabwa bwisunze abashobora kuhoneka n'ubunyo bizotwara

Nyakwubahwa Mushikiranganji,

- a) mutegekanya gute ingene muzotora abo bakozi muzorungika?**
- b) niba ata bibazo bizotunganywa, ubwo ntimubona ko hazohava hakoreshwa aka mwana wa mama canke ka mpinga yanje?**

INYISHU

- a)** Ni ivy'ukuri ako gace karategekanya ingene ivyo bihugu bizohanahana abakozi, kakavuga ko Ubushikiranganji bw'imigenderanire y'Uburundi n'amakungu buzogerageza gutanga abakozi basabwa bwisunze abashobora kuboneka n'uburyo bizotwara; ariko kandi ako gace nyene karavuga ko imbere yo kurondera abo bakozi, Ubushikiranganji bw'akazi bw'ighugu ca Qatar buzotanga urutonde rw'abakozi ico gihugu gikeneye. Agace ka kane ari na ko kazisungwa cane n'ubwo bushikiranganji karasigura neza ko muri urwo rutonde rusabwa bazovuga neza abo bakeneye baravye ubushobozi bafise (qualification), ubumenyi bafise mu kazi (expérience) n'ivyo bakwirikiranye (spécialisation), n'ibindi.
- b)** Twisunze inyishu duhejeje gutanga aho hejuru rero, turabona ko ata ka mwana wa mama canke ka mpinga yanje kazobamwo mu kubarungika . Ikindi ni uko ico gikorwa twagihaye amashirahamwe yigenga ngo agikore, ariko nahos azogikora, agikora ashinzwe ijisho na Reta kuko ari na yo basezeranye ingene ategerezwa kugitunganya. Turafise igisata gisanzwe gikurikirana ayo mashirahamwe ku munsi ku munsi, kinayagendera, kigasuzuma ko ariko akora ukwo twasezeranye. Bishitse tukumva imyidogo hirya no hino ijanye n'akarenganyo, iryo shirahamwe rizorengutswa kwisigura, bibaye ngombwa rihagarikwe. Ariko twobaremesha ko ivyo bitazoshika, kubera ko n'ighugu ca Qatar kibishiramwo uruhara mu gucongera neza ingene igenwa rigenda nkuko bivugwa mu ngingo ya gatatu agace ka gatatu k'ayo masezerano.

IKIBAZO CA 4

Ingingo 8 agace A ivuga ko umukoresha ari we ategerezwa kuriha uburyo bwo kwiyunguruza bubavana mu gihugu c'Uburundi bubashikana muri Qatar iyo bagiye gutangura akazi canke bava muri Qatar batashe i Burundi mu karuhuko canke iyo ikiringo c'akazi kirangiye.

Nyakwubahwa Mushikiranganji



- a) nta makenga mufise ko iryo tike rizohava riva mu mahera bari kubahemba ugasanga bariko bakorera intica ntikize?**
- b) mbega mu gihe yogwara akarembo, ninde yomukurikirana mu bijanye no kwivuza?**
- c) bishitse umukozi akitaba Imana ni nde azotahukana ikiziga ko ataho twabonye bitegekanijwe?**
- d) mbega hoho, hoba hariho agashumbusho gategekanwa ku muryango wabuze ?**

INYISHU

- a)** Ni vyo amasezerano avuga ko umukoresha ariwe azoriha uburyo bwo kwiyunguruza kuva mu Burundi gushika muri Qatar.
Kuri ico kibazo nta makenga na makeya ahari ko umukozi azokorera intica ntikize kuko umukozi azova mu gihugu afise amasezerano y'akazi (Contrat) aho umushahara azokorera uba uzwi neza kandi wanditswe muri ayo masezerano. Hari itandukaniro rero riri hagati y'iryo ticket ry'umukozi hamwe n'umushahara azokorera.
- b)** Mu karorero k'amasezerano hagati y'umukoresha n'umukozi kakaba kagize igihimba ciyongera kuri aya masezerano ari hagati y'igihugu c'Uburundi n'igihugu ca Qatar, harategekanijwe ko umukoresha avuza bikwiye umukozi wiwe yisunze amategeko y'igihugu ca Qatar. Ivyo rero bikaduha icizere ko umukozi agwaye azovuzwa vyihuta ata ngorane zihabaye nkuko bisanzwe bitegekanijwe mu ngingo y'icumi y'aya masezerano.
- c)** Nkuko bivugwa mu ngingo ya kabiri y'aya masezerano ko itangwa ry'akazi ry'abakozi b'abarundi, ugishikayo, n'akazi bazokora muri Reta ya Qatar bizogengwa n'amategeko y'ibihugu bibiri, gutahukana ikiziga c'umukozi w'umurundi apfuye ari mu kazi, hazokwisungwa itegeko rigenga akazi ryo muri Qatar mu gingo yaryo ya mirongo itanu n'indwi agace ka gatatu kavuga ko umukoresha ari we ategerezwa kuriha amahera ajanye no gутегура ishingurwa ry'umukozi yitavye Imana n'ayajanye no gutahukana ikiziga mu gihugu camurungitse canke aho yari asanzwe aba ari ku kazi mu gihe umuryango wiwe ubisavye. Hazokwisungwa kandi agace k'yo ngingo ka kane kavuga ko iyo umukoresha adatahukanye ikiziqa c'umukozi

wiwe, intwaro ya Reta ya Qatar ica ibikora vyose hanyuma ikazorihisha uwo mukoresha amahera yose yakoreshsheje ibicishije mu ntwaro nyene. Twobamenyesha ko mu gihe ivyo vyose duhejeje kuvuga bitokurikizwa ko hazoca hakoreshwa amahera y'ingwati yatanzwe n'ishirahamwe rizoba ryararungitse uyo mukozi.

- d) Twisunze uko twatanguye kwishura ikibazo ca c) aho hejuru, itegeko rigenga akazi rya Reta ya Qatar ingingo ya mirongo itanu n'agatanu (55) ivuga ko iyo umukozi apfuye ari ku kazi, umukoresha aca ashira mu kigega ca Sentare ibifitiye ububasha, mu misi itarenze cumi n'itanu kuva umukozi apfuye, umushahara wiwe n'utundi turusho tw'umukozi atibagiye amahera yaziganirijwe azomufasha mu gihe co gukukuruka. Iyo Sentare ica ibishikiriza umuryango akomokamwo canke umukomokako yisunze itegeko rigenga idini rya islam canke amategeko y'igihugu c'uwo mukozi yapfuye.**

IKIBAZO CA 5

Ingingo 8 agace B ivuga ko umukozi ashobora kwirukanwa iyo akoze ikosa rihambaye. Muri ico gihe ntibirirwa baramugisha inama canke ngo bamutekerere agashumbusho.

Nyakwubahwa Mushikiranganji,

- a) ko uwo mukozi aba ari mu mahanga bakamvirukana ubutarariye, haraho mwategekanije yoba arabu mukurindira ko aronka akandi kazi canke agatike kamugarukana mu gihugu c'amavukiro na cane cane ko tuzi ko hariho abakoresha usanga batoroshe?**
- b) mwoduha uturorero tw'amakosa amwe amwe yotuma umukozi yirukanwa ubutarariye?**

INYISHU

- a) Mu bisanzwe iyo umukozi yirukanwe ubutarariye ni uko biba bigaragaye ko bivuye ku makosa yiwe, bitegekanijwe ko aca atahanwa n'ishirahamwe ryamurungitse hakoreshejwe amahera y'ingwati yatanzwe n'iryo shirahamwe.**
- b) Amakosa yotuma umukozi yirukanwa mu kazi avugwa mw'itegeko rigenga akazi rya Reta ya Qatar mu ngingo yaryo ya mirongo itandatu na rimwe. Nk'akarorero riravuga ko umukozi yirukanwa ubutarariye iyo:**
- amenye amabanga y'akazi;

- iyo umukozi yagiriwe n'icaha co guhonyanga agateka k'umukoresha wiwe;
- iyo umukozi asivye ku kazi yikurikiranya imisi indwi ata mpamvu canke imisi cumi n'itanu mu kiringo c'umwaka ata mpamvu;
- n'ibindi....

V. GUSOZERA

Integuro y'ibwirizwa mu ngingo zayo zose irorohereza abakozi bazogenda gukorera mu gihugu ca Qatar kubera ko vyose bizokorwa mu mwumvikano ntangere kuva bakibarondera gushika bagende bongere bagaruke ikiringo cabo kirangiye neza. Amasezerano hagati y'umukozi n'umukoresha azoba atomoye ku buryo uwutazoyashima atazemera kuyaterako umukono. Ikindi kandi ni uko rije kugabanya ubushomeri mu rwaruka. Eka mbere n'igihugu kizoharonkera amafaranga mvamakungu.

Kubera izo mvo, umurwi wamaho ujejwe ibibazo vy'intwaro, kwegereza ubutegetsi abenegihugu no kugenzura ingene baserukiwe mu nzego z'igihugu umaze kwihweza ugashima impinyanyuro zashikirijwe n'Inama Nshingamateka usavye abubahwa bakenguzamateka bashashe muri ibi bikorwa kwemeza iyi nteguro y'ibwirizwa nk'uko yashikirijwe.

**KUBW' UMURWI WAMAHO UJEJWE IBIBAZO VY'INTWARO,
KWEGEREZA UBUTEGETSI ABENEGIHUGU NO KUGENZURA
INGENE BASERUKIWE MU NZEGO Z'IGIHUGU;**

Umukenguzamateka Spès NDAYIZEYE, Umukuru w'umurwi.

